

外科證治全書

序

士人讀書明理期於世有所濟立功名以見重當時此體用兼備之學也若學成理明無意立名而慈祥之念無時無地不期於濟世此其品詣不又加人一等乎哉余觀倫聲許生外科證治一書而有感焉倫聲少嗜學經史而外旁及諸子百家一名一藝之微手披目覽各有所得山居數十年怡然自樂不肯以學自炫閒因良善之家式微爲之指示趨吉脩方或嬰孩疾痛時醫束手爲之施送藥餌無不速效人始奇之由是名噪於士大夫間延訪遂衆辭之不獲已擇近地大山水處始一命駕人與之款洽言皆

經濟文章絕不及他事庚寅春余遇於皖江郡城年逾八十白髮蕭疎神明弗衰非學養之醕耶嗣余權篆蕪關通尺素書邀其掉扁舟冒雪而來圍爐談論竟日叩其生平閱歷如郡縣學宮添建文峯高閣不周歲而人文蔚發是何神速倫聲則謙讓未遑謂吉凶皆盈虛消長自然道理一有趨避必干造物之忌若乃勝地名區善人多則吉祥自生趨吉之說皆事之適然相合非盡關人力也其言似謙其實有至理存焉臨別檢行篋余見有外科證治一書則續成其故友畢蒼霖未竟之業其部首分別陰陽證治其卷末並列急治五條共書五卷自記甚悉余益歎其品

學之優也書成不獨擅其美必推善於創始之良友其所
分門別類者皆二十餘年歷試活人無算之實學非借著
書立說以求聲譽者比余將遠別數千里外此書若仍攜
歸恐久而失傳爲借鈔副本付剞劂以質世之精醫理者
雖曰小道亦足見倫聲所學之緒餘與濟人之素心云爾
生名克昌和州國學生倫聲其字也時
道光歲次辛卯夏月督權使者雲夢程懷璟書於上海權
署

自記

昌性好醫少時誦讀之暇訪求名醫著述見外證與小兒痘證兩門生死反掌非比內證尙可延遲待治聞東臺周舒軒先生精醫術昌往從學焉十餘年深究精思稍知梗概繼得鄭西賓痘證必讀雖集腋成裘而分門晰類瞭如指掌又得前明耿仁齋麻科明鏡遺稿惜乎殘缺過半昌爲之增著刪繁分列四篇便於習學二書皆梓行於世第外證一書汗牛充棟偏執者多適中者寡有同人畢蒼霖者著外科證治闡發透澈於外證大有裨益蒼霖甫著兩卷年未三十而卒書成廢帙昌雖不敏廣集諸名家外科

考證訪求效方立癰疽就簡於各證部之首分別陰陽臟腑經絡認證醫治歷試二十餘年診視送藥無不獲效四遠就醫者歲無虛日又增內景外因奇證蠱證中毒五條併立應驗藥方附於書末以備急用共成五卷非敢問世聊以備遺忘耳許克昌自識

序

有學問之醫有閱歷之醫外科古有專業無專書故閱歷爲尤切漢唐作家十數然多亡佚無徵今其理則具於靈樞素問其病名治要則莫先於病源莫精於千金莫詳於外臺顧閎深奧衍未異通曉且時異事殊卽方藥所載或至貴而驟不可得或甚賤而莫識其名是以精而用之者蓋鮮自後源流不一治遂多歧其專門名家大率由閱歷而進之學問者也近世外科證治一書不爲高論一以陰陽虛實爲之端法期簡要方必中和深有取於王氏全生集而刪繁補缺幾於明備覽之而得其歸用之而有其效

視他書徒眩名目侈陳古義或不甚切於日用者有閒夫
自武進曹畸菴有瘍醫雅言之述千金外臺將可以復明
於世獨於宋後諸家等之自檜以下今以此書爲槁矢則
學問卽閱歷閱歷亦學問泝流窮源庶無遺憾耳謹識其
大槩以諗世之篤嗜斯道者

同治乙丑冬孝感屠仁守書於成都寓齋

重刻外科證治弁言

一此書創刻於吾鄉程玉農廉訪垂今三十餘年未見別本將來流傳必且益少蜀中同官諸君子相與醵資重刻誠爲快舉

一蜀中論外科推王氏全生集爲善本此書於全生集採摭尤備於其所不備者又皆大備故此書較全生集有過之無不及也

一此書初刻體例多未畫一舛錯尤甚茲刻屬知醫者再三讐校凡是正二百餘條仍間有誤文實因無可勘據不若姑闕疑以傳疑

一此書引用各家皆未注明來歷係是隨時甄錄意在得
瘥而止茲刻亦不及徧考識者詳之

一附刻全生集醫案因與此書足相印證參閱良便

一此書不及丹藥茲得瘍醫雅言丹藥方簡明切要錄附
於後以成完璧其意詳見識語中

同治丁卯仲春月京山易崇堦倥侗氏書

外科證治全書卷一

凡例

一是書逐證措治條分部款甚詳其有證治同而部位名異者因立癰疽就簡於各部之首辨明紅白陰陽按癰疽治法便於查閱萬無一失

一凡有方而僅治某證者則列於某證之後有方而通治諸證者則另立通用方類逐方排著不致雜亂其用藥分量俱備庶無臨證乖方之誤

一人身臟腑陰陽各具形義經絡部位各分攸司猶兵家之地利也不知地利不可以爲軍師不知臟腑經

少陽言卷之三 一
絡而克得爲醫師乎歷來諸書經絡歌括文句參差
聯章成誦辨晰爲難今閱陳見飛先生小集中有外
自頭目以至足內自心肝脾肺腎以及六腑筋脈景
說次第成列良爲盡善爰採以分列各部爲學者便
於因證參閱也

一五善七惡歌是書本不欲取葢癰疽之初不過營氣
壅遏衛氣鬱滯致成瘡腫因其勢而利導之皆屬善
全何惡之有迨其日久潰腐或陰陽誤治或氣血衰
羸則七惡蜂起斯時反惡歸善回天之力不可謂非
醫家之責也茲錄二歌者一以畏矯古之譏一以備

吉凶之鑒耳願世之醫家勿以現有惡象盡誘不治
苟有一綫可挽當參酌援之更以內科脈理詳審之
庶不愧爲仁術

一世人以升降藥爲外科拔膿之要藥殊不知升降藥
乃鹽礬砂汞火力煅煉而成藥之霸道者也去瘀生
新或有賴焉若證患日久氣血本已虛虧豈可任用
霸劑必補氣血爲主禁痛禁爛全生集中已切言之
焉可忽諸凡外證之初起者消之痛痒者止之潰爛
者斂之臨危者救之去瘀用平安餅鍼頭散生新用
象皮散六和散獲效奏功百無一誤是知升降藥雖

有益而亦有損也故二方不入選用

一各部癰疽證治分別陰陽言語每多重贅恐人偶一認錯爲害不淺學者詳之

一罕見罕聞之奇疾醫書亦不可缺載其按部位而患者分列部位其患無定處共集一類又如血擁號蟲等類者茲更集奇疾怪蟲兩門冀或偶有是病便於醫治

一方藥所當炮製者須按本草照法精製不可忽畧如製番木髓等與本草稍異另附列製法於後

一惡蟲證中有蟲證皆稟陰陽不和溼熱毒生凡有蟲

傷則於蟲傷門尋類推治

一中毒類似與外科無涉要知醫乃仁術何在非救人之道卽飲食藥餌亦有中其毒者待及求方問藥人命休矣故亦錄附卷後且可爲養生者知所慎防云耳

一是書採集羣書並經親見獲效其閒折衷萃輯五易稿而始成癰疽證治皆所親驗苟依方脩合認證用藥洵使窮荒僻壤咸慶生全識者當不以鄙言爲狂僭也

外科證治全書卷一目錄

卷之一

癰疽證治統論 癰疽部位名記

胃氣論

論腫

論潰

論斂

論痛

論痒

五善歌

七惡歌

飲食宜忌論

陽癰證治則例

陰疽證治則例

爛潰不斂治法

翻花起肛治法

患孔毒根治法

漏管治法

多骨治法

毒氣攻心治法

破傷風治法

發瘰證治

瘡口誤入毒水治法

瘡中生蛆生蟲治法

頭面證治

計十證

面部證治

計十六證

眼部證治

計廿三證

卷之二

鼻部證治

計十一證

耳部證治

計十四證

口部證治

計八證

脣部證治

計八證

齒部證治

計十七證

喉部證治

計十四證

誤吞類

八條

卷之三

項部證治

計五證

胸部證治

計三證

乳部證治

計五證

腋脇三部證治

計三證

肩部證治

膊臂手三部證治

計十八證

背部證治

計一證

腰部證治

計三證

腹部證治

計四證

前陰證治

計十證

後陰證治

計六證

股部證治

計四證

膝部證治

計四證

脛部證治

計九證

足部證治

計十六證

卷之四

發無定處證治

計四十證

內景證治

計八證

惡瘡證治

計五證

奇疾證治

計九證

怪蟲證治

計九證

外因雜傷證治

計三十證

卷之五

通用法

計七法

備用法

計六法

通用方

計七十六方

附中毒類

計五十六條

外科證治全書卷一

環峯許克昌倫聲

同輯

木末畢 法蒼霖

癰疽治法統論

問曰癰疽何爲而發也答曰人之一身氣血而已非氣不生非血不行氣血者陰陽之屬也陰陽調和百骸暢適苟六淫外傷七情內賊飲食不節起居不慎以致臟腑乖變經絡滯隔氣血凝結隨其陰陽之所屬而攻發於肌膚筋脈之間此癰疽之所以發也曰然則癰疽有別乎曰癰者壅也邪熱壅聚氣血不宜其爲證也爲陽屬六腑高腫色

紅焮熱疼痛而其發也必暴故所患浮淺而易治疽者沮也氣血虛寒陰邪沮逆其爲證也爲陰屬五臟漫腫色白堅鞭木痛而其發也必緩故所患深沈而難療此癰疽之所以別者然也曰然則其治之也當若何曰初起者審其證而消之成膿者因其勢而逐之毒盡者益其所不足而斂之此治癰之大旨也於是乎未出膿前癰則宣其陽毒之滯疽則解其陰寒之凝已出膿後癰則毒滯未盡宜托疔有寒凝未解宜溫既患陰疽雖在盛暑之時必用辛熱之劑以助陽氣如生陽癰雖在嚴寒之時必用寒涼之劑以瀉火邪不拘盛暑嚴寒但當舍時而從證也曰然則視

其外卽可知其內歟曰吾聞之醫者意也有諸內則形諸外故四診爲醫家辨證之筌蹠而望居其一是以外科之證形色可憑善惡可準一定而不移顯然而易見非若傷寒證有傳經之變也蓋色紅焮痛者實熱壅聚也色白陰痛者虛寒沮逆也憎寒發熱者表邪未解也口渴便秘者裏邪未通也紅活高腫者氣血拘毒於外也白塌漫腫者氣血冰結於內也根紅散漫者氣虛不能攝血緊附也不痛堅韌者血凝不能附氣流行也外紅裏黑者毒滯不化也紫暗不明者胃氣大傷而肌肉死敗也按之陷而不卽高頂雖溫而不甚熱者膿尙未成也按之隨指而起頂已

軟而熱甚者膿已灌足也膿色濃厚者氣血強旺也膿色
清淡者氣血衰弱也諸如此類審其外悉其內按其委瀰
其源此所謂望而知之者也曰然則瘡疥之與癰疽同乎
否有不發爲癰疽而發爲瘡疥者何也曰人之軀殼計有
五層皮脈肉筋骨也發於筋骨間者疽是也發於脈肉間
者癰是也發於皮腠間者瘡疥之屬是也大抵營衛不足
溼熱邪風肥甘濁氣淫於肌膚留滯不散則瘡疥所由生
或痒或痛或膿或水名類頗多治法不一熱則涼之溼則
利之蟲則殺之風則散之燥則潤之滋之更宜戒沐浴以
避溼氣忌厚味以清營衛而瘡瘥矣此所以較癰疽之證

治有大同而小異者焉噫人能慎養氣暢血盈不使形體有衰則癰疽瘡疥從何而發苟或不然百病叢生又豈惟癰疽瘡疥而已哉古人不治已病治未病非虛語也安得人人及乎其未病而治之歟

癰疽部位名記

紅腫曰癰白塌曰疽部位既殊稱名亦異在頭爲大頭毒於頭頂中爲玉頂發百會疽前額門際爲透腦疽側下爲侵腦疽額門前爲佛頂疽於額爲額疽額角爲旁額疽腦後爲玉枕疽下爲腦後發爲對口腦疽偏爲偏腦疽爲燕尾魚尾毒爲腦鑱於髮內爲油風爲蛀髮癰白禿瘡髮際

瘡爲蠟梨瘡其於嬰孩也爲鱗瘕頭爲蝮蝨瘡在面爲面
遊風爲肺風粉刺爲白屑風爲雀斑爲黧肝黧爲黑痣於
眉爲鳳眉疽爲眉心疽眉尾爲瘰疽於眼爲時火眼爲淹
纏赤眼爲眼丹爲偷鍼爲皮翻證爲眼疱痰核爲眼疱菌
毒爲睛目中努肉爲椒瘡爲漏睛瘡於鼻爲鼻癰鼻疔爲
鼻淵腦漏控腦砂爲鼻蠱爲鼻痔爲酒皸鼻爲鼻衄其下
爲馬刀瘡於脣以上爲脣疽爲龍泉疽於脣爲脣風爲蘭
脣爲反脣疔爲鎖口疔脣以下爲虎鬚毒於顴爲顴瘍顴
疔爲羊鬍子燕窩瘡爲落下頰在鬢爲鬢疽爲勇疽爲顴
疔在耳爲耳病耳竅內爲黑疔耳疳耳挺耳痔耳聾耳上

梢後摺開爲耳後疽耳摺開連耳輪通腫爲耳發耳垂後
爲耳根毒耳後縫間爲旋耳瘡耳後一寸三分高骨後左
爲天疽右爲銳毒於腮爲疔腮爲發頤爲頰瘍爲頰疔爲
面發毒爲凍風其口內於大人爲口破口糜爲牙癰爲牙
宣爲牙疔爲齒齲爲風火蟲牙爲齒齲爲齒齲爲骨槽風
爲舌腫爲紫血脹爲舌衄爲重腭爲痰核爲舌疔爲舌疳
舌蕈瘰癧風爲舌鞭生衣爲痰包爲重舌爲喉痺爲喉閉
啞瘡喉風爲弄舌爲乳蛾蛾子喉風爲纏喉風爲鎖喉爲
喉癰爲喉疔爲喉珠爲喉蕈喉瘤爲上腭癰爲骨梗其於
嬰孩也爲鎖牙疔疔爲走馬牙疔疔爲垂癰爲白口瘡爲鵝口

瘡在項爲結喉癰爲雙發喉側爲夾疽夾喉癰爲落頭瘡
爲失榮爲瘰癧爲氣癰爲氣癰爲百脈疽項下顴骨陷中
爲蠱疽缺盆疽鎖骨疽項後爲天柱疽稍下爲脾肚癰其
於婦人也爲鈕扣風在肩正中爲肩中疽肩穴中爲肩擔
肩前廉爲乾疽肩後廉爲過肩疽肩後腋外爲膠疽肩梢
尖爲肩風毒肩前腋上骨縫開合坳陷中爲樂疽於臑爲
臑癰爲藕包毒臑後垂肉處爲魚肚發肘尖上寸餘爲石
櫛疽當肘爲肘癰於臂爲臂癰臂疽臂外廉爲骨蠹疽掌
後橫紋上三寸爲穿骨疽掌後橫紋上二寸爲螻蛄串腕
背面爲腕癰腕裏面橫紋前梢動脈間爲兌疽於手爲手

發背爲病蝦爲掌心毒爲癰瘡爲鵝掌風爲虎口疽丫叉
毒爲合谷疔爲紅絲疔爲手丫發於大指爲調疽於指頂
堅鞭有頭爲蛇頭疔悶腫無頭爲天蛇毒指甲旁爲蛇頭
疔指甲後爲蛇背疔指骨節爲蛇節疔指裏面如魚肚爲
蛇腹疔一指通腫爲泥鰍疽指甲身內爲代指爲甲疽指
骨節癰大爲蜣螂蛀油灰甲爲鵝爪風兩手及臂紅紫斑
爛爲狐尿刺其於胸也乳上肉高處爲甘疽兩乳中央爲
顛中疽心窩中爲井前疽心窩兩旁爲脾發疽胸側乳上
瘡孔多爲蜂窩疽乳旁爲瘰癧癰其於內也爲肺癰爲胃
癰爲脾癰爲肝癰爲腸癰其於婦也爲內外吹乳爲乳巖

爲乳疽爲乳發乳癰爲乳懸爲乳中結核於腋爲腋癰腋
疽爲暗疔爲鴨蜚毒於肋爲肋疽腋下三寸爲淵疽肋骨
延及腰胯爲內發丹毒肋下軟肉爲季腋癰疽在背上下
爲對肺發對心發對臍發爲蓮子發爲蜂窩發爲酒毒發
爲丹毒發爲連珠發爲痰蛙發爲陰陽之氣疽爲禽疽爲
肉龜黃瓜癰偏爲上中下搭手背脇間爲串疽其於腹也
臍上七寸爲幽疽上四寸爲中腕疽胃疽上三寸爲嚇疽
上二寸爲衝疽於臍爲臍癰爲臍中出水爲腹皮癰偏爲
箭袋爲少腹疽旁爲緩疽其於內也爲息賁爲伏梁爲痞
氣爲肥氣爲奔豚其於孩兒也爲臍突爲臍瘡於腰爲腎

俞發爲蛇串纏腰火丹於腎爲疔瘡久而偏潰爲蠟燭瀉
爲子癰爲囊癰囊脫爲腎囊風爲懸癰腎囊後爲穿襠發
大骹根裏側縫夾空中爲跨馬癰小腹下陰毛旁結腫爲
橫疔小腹下骹根上摺紋中左爲魚口右爲便毒陰毛際
爲人腳蟲陰虱瘡其於婦人也爲陰挺爲陰腫爲蚌疽爲
陰蝕蠹瘡爲陰脫爲陰癰總名陰瘡在臀爲臀癰爲臀疽
爲坐板瘡中尾骨尖爲鶴口疽尻骨前肛門後爲湧泉疽
肛門兩旁爲臟毒肛門內外爲痔瘡肛門前陰根後中間
爲偷糞鼠潰經走洩爲海底漏尻骨高骨畧上爲坐馬癰
左臀下摺紋中爲上馬癰右臀下摺紋中爲下馬癰白爲

東瓜癰其於孩兒也爲脫肛爲肛門作痒在股外側胯尖
後爲股陽疽在胯骨節間爲環跳疽大骭外側爲附骨疽
大骭裏側爲咬骨疽股內合縫下近囊側爲股陰疽右骭
夾陰縫摺紋中爲陰疽大骭正面膝蓋上六寸高肉處爲
伏兔疽大骭肚爲肚癰大骭裏側近膝爲箕門癰遠骭爲
骭游風骭起雲片茄色腫鞭毒攻牙齦爲青骭牙疳於膝
爲膝癰爲疔疽爲膝眼風爲鶴膝風膝兩旁爲緩疽膝後
摺紋中爲委中毒骭坳摺紋兩梢旁爲上水魚膝腫似人
形爲人面瘡於骭脛骭肚爲腎氣游風膝眼下三寸外爲
三里發小骭裏側長數寸爲黃鰓癰小骭肚下長二三寸

爲青蛇毒脛骨下足後根相接處爲接骨發內踝上三寸
爲附陰疽在內爲走緩鞋帶疽在外踝爲腳拐毒裏外踝
骨通腫不紅爲穿踝疽生脛骨一二寸爲溼毒流注繞脛
而生爲瓜藤纏於小髌爲流火小髌肚中爲腓膈發髌肚
爲魚肚癰孔如鑽眼黃水綿綿爲鱗漏髌脛廉骨或裏或
外爲膝瘡兩髌坳及兩腳灣爲四灣風脛骨曲坳處爲風
疽於腳骨爲夾棍疽潰爲驢眼足背爲足背發足心爲湧
泉疽腳底爲牛程蹇足掌起如豆粒黃泡爲田螺炮大拇
指爛爲臭田螺足指色黑旁有紅暈爲脫疽足無名指患
色白而痛甚爲脫疽足指甲旁努肉高起突爲甲疽爲肉

刺雞眼足跗兩旁小如棗栗爲厲疽癰足跗之前上下大如癰爲四淫足攣跟爲足跟疽足跟旁如棗栗黃腫若琉璃爲土栗足跟底起紫白泡爲冷疔膝下足上腳氣於腳丫爲腳丫疽其於婦人也爲裙帶風瘡至若發無定處者爲時毒爲黃水瘡爲惡核爲石疽爲癰癰爲流注爲疔瘡爲多骨疽爲痼發爲蛇瘡癰疽爲大麻風爲楊梅瘡爲結毒爲血箭爲痣爲血風瘡爲白駁風爲血疔爲赤白游風爲汗斑紫白癩風爲癰瘍風爲破傷風爲發瘰爲風疔爲頑癬爲痔瘡爲蛇風虱白疔爲疥瘡爲火赤瘡爲貓眼寒瘡爲魚脊瘡爲翻花瘡爲漆瘡爲天泡瘡爲栗瘡作痒爲

倣冬瘡爲瘡癰爲天火丹毒爲瘰疽爲痛風爲痒風爲毒
氣攻心爲瘡口誤入毒水爲諸瘡生蠅蛆爲暑令瘍毒小
癰爲體氣爲黑子痣其於嬰孩也爲遺毒爛斑爲胎瘤爲
痘癰痘疽爲痘爛爲痘風爲奶癰胎癰瘡或跌撲爲金瘡
爲杖瘡爲夾傷爲桡傷爲湯火傷爲鐵鍼入肉爲箭頭入
肉爲竹木刺入肉爲人齧傷爲熊虎狼齧傷爲馬齧傷爲
犬齧傷爲豬齧傷爲貓齧傷爲鼠齧傷爲蛇齧傷爲蜈蚣
齧傷爲射工傷爲蝎螫傷爲蠅蝥傷爲蚯蚓傷爲蜘蛛齧
傷爲羊棘子螫傷爲蜂螫傷爲蠶齧傷爲壁虎齧傷爲螻
蛄齧傷爲螞蝗齧傷爲蟻螫傷爲砂虱傷爲石蛭傷爲海

水傷又其惡瘡也爲天行瘡爲頑瘡爲癩瘡爲罕瘡爲無
名瘡其奇疾也爲血擁爲棠梨炮爲肉人爲肢癢爲肉蝶
爲肉綫產婦腹中痒爲氣旋爲氣奔其怪蟲也爲號蟲爲
厲虱爲紅綫蟲爲續命蟲爲溼蟲爲腐蟲爲肉蛆爲信蟲
爲月望蟲諸名有辨治證無訛初起未潰當觀現在之形
已潰潰久須問初起之色初起色紅應施癰藥初起色白
當用疽丹識證惟精奏效如響

胃氣論

胃屬土胃氣卽土氣也土爲萬物之源胃爲養生之本胃
強則人強胃弱則人弱有胃氣則生無胃氣則死甚矣胃

氣之關於人者不亦鉅哉經脈別論云食氣入胃濁氣淫於心淫精於脈脈氣流經經氣歸於肺肺朝百脈輸精於皮毛毛脈合精行氣於腑腑精神明留於四臟此可知臟腑形體莫不皆有胃氣也凡證之現五善七惡者非臟腑胃氣存亡之明徵乎胃氣一失便爲凶候故善治外證者無論大小輕重必先顧其胃氣察其能食不能食以驗之能食者胃氣強內顧無憂固可專治外證不能食者胃氣弱中州坐困禍起蕭牆必須先定內患令其能食待血氣有所資賴然後再治外證所謂本立而道生也然理脾胃者人只知瀉苓朮草查樸麥牙之類爲脾胃之藥而不知

風寒溼熱飲食勞倦皆能傷脾如風邪傷者宜散之寒邪傷者宜溫之溼邪傷者宜燥之熱邪傷者宜清之飲食傷者宜行之勞倦傷者宜補之但去其傷脾胃之病卽是理脾胃之正藥也奈何今之業外科漫守一二成方開口便云有毒概用寒涼漫施攻伐以致受害而斃命者不可勝數豈古方之不宜於今也抑藥證之大相背謬耶蓋不察其胃氣之強弱病因之虛實爲何如耳且夫古人資稟樸質其從七情干涉者少而從風寒濕熱外感凝滯者多故證之初起每每用霸藥取效今之穿鑿太過七情六慾煩擾之甚而陰陽血氣無有不虧傷者亦偏用霸藥成方以

試之是投之於井而更加之以石也吾知其胃氣微虛者
猶可出入而胃氣大虛者斷難假借也故曰癰疽外證肌
肉之病所用之藥有病則病受之於脾胃何涉乎殊不知
肌肉乃脾胃所主治藥乃胃氣所關肌肉不能自病脾胃
病之諸藥不能自行胃氣行之諸藥入口必先入胃而後
行及諸經以治其病也未有藥傷其脾胃而能愈病者亦
未有不能運行飲食之脾胃而反能運行諸藥者也惟明
鑒者察之

論腫

癰疽之起總由血氣壅滯所致如河渠淤塞者然苟使血

氣流暢何癰疽之有故火毒壅滯則紅腫焮痛而成癰寒痰壅滯則白塌木腫而成疽癰作實熱治疽作虛寒治一目了然不俟診脈可知也及其壅滯既久變好血而成膿創好肌而破口苦矣哉當初未作膿之時亟隨癰疽證治消治之俾其痛止腫平安然暢適豈不快歟每見恃能刀鍼不細察病情當用刀鍼否漫云洩毒乃殺人不轉睫之徒也不但病人負痛已甚又何能堪此痛苦更有妄施刀鍼以致潰爛難斂七惡蜂起仁心仁術者諒不妄爲若此也

論潰

癰疽初起失治致肌膚潰爛凡癰將潰之時則先消其未成膿之地而潰不致於延爛既潰之後則補托其未盡之毒而潰不致於翻花有膿成而不自潰者虛人內服代刀散外用齧頭膏無有不潰如氣血壯盛皮肉粗厚之人卽以鍼刺分許亦可但疽始終總以溫補開腠消解爲治王洪緒先生云疽初起卽見平塌安可用托托則致潰卽流注瘰癧惡核等證倘有潰者仍不敢托托則潰者縱斂增出者又如何耶旨哉言也

洪氏曰凡大癰潰後世人往往投灸草灸者或用半灸半生殊不知內托散等方用人蔞者非以補其虛不過以人

淺助黃耆托毒之力而無補毒之害蓋灸耆止補氣不能托毒灸草只補中不能解毒倘毒氣未盡誤投灸耆灸草致毒反受補助大痛內攻將如之何余之治凡遇初潰大癰止其痛痛息則毒散其腫亦退色轉紅活體虛年老者淺耆甘草皆灸也如體旺家貧者無淺亦可收功

論斂

肌肉者脾胃所主收斂者血氣所關苟使脾胃強血氣旺則昨腐今生朝膿夕斂何致遷延歲月臭爛起肛受苦萬狀故曰初腫宜消其壅滯之漸既潰宜托其惡毒之餘毒盡宜斂斂之法但當大壯血氣純補脾胃不可泛敷生肌

之藥蓋毒盛自潰毒盡自斂如水到渠成不容矯強以圖速效若餘毒未盡妄敷生肌藥阻蓋毒氣反致延邊腐臭爲害非淺果其痛失腫平色轉紅活而內補外敷不日可斂矣學者審之

論痛

諸痛皆由氣血淤滯不通而致凡寒熱虛實膿淤風氣皆能爲痛不可不爲之辨夫色赤焮痛者熱也色白痠痛者寒也不脹不悶揉按暫安者虛也又脹又悶畏人揆按者實也痛如筋牽雞啄惡寒惡熱者膿也痛如肉拗氣抽微脹者淤也痛而走注者風也痛而刺脹者氣也諸痛如此

而止痛之法要在臨病制宜熱毒之痛以寒涼折其熱而痛自息寒邪之痛以溫熱和其寒而痛自除因虛而痛者補其虛因實而痛者瀉其實因燥而痛者潤之因塞而痛者通之因膿血閉鬱者開之因惡肉浸潰者化之因陰陽不和者調之因經絡祕澀者利之隨機應變方爲上上治法也

論痒

痒雖屬風亦各有因凡初起作痒者風熱相搏搔甚卽痛是也潰後作痒者膿瀰冒風突起顆瘡是也將斂作痒者因初時肌肉結滯氣血不通至此氣血漸和助養新肉痒

若蟲行是也他如皮膚搔痒由血燥而風生疥癬延綿屬風淫而蟲蝕證有不同治有微別勿視爲一類也

五善歌

心善精神爽言清色潤鮮瘡疼兼不渴寤寐兩安然肝善身體便睛明不怒煩指頭紅活色起坐自平安肺善聲音響無痰韻更長肌膚多滑潤大便自尋常脾善唇滋潤肢溫便不難膿稠無臭惡知味且加餐腎善誠爲要水深火自降口和無燥渴小水得稀長

七惡歌

一惡神昏憤心煩舌燥乾瘡形多紫黑言語自呢喃二惡

腰身強睛斜體自寒瘡頭流血水驚悸是傷肝三惡形消瘦膿清臭穢生瘡形多輒陷脾敗不知疼四惡皮膚槁聲嘶韻不長痰多兼喘促鼻動肺將亡五惡成消渴昏眠體不伸形容多慘黑囊縮腎無根六惡身浮腫腸鳴嘔呃頻大腸多滑瀉臟腑並將傾七惡瘡回陷形如剝鱗同四肢多逆冷污水自流通

飲食宜忌論

古人治病雖賴乎藥亦資乎餌藥之所忌關乎人之死生餌之宜忌涉乎病之輕重餌者飲食之類也凡病人恣啖無忌以致證候因循反覆變態無常固然不可而每有斷

戒幾盡若一無可啖者亦不通之甚也夫飲食之所忌者以其與所患之證相妨者也如椒薑麪蟹煎炒博炙之屬俱能助壅動熱患陽癰者忌之瓜果梨柿生冷性寒之屬俱能損胃傷脾患陰疽者忌之雞鵝蝦蟹海味腥羶之屬俱能動風發痒患瘡疥者忌之其餘不與證相妨礙者以及豬肉腰肚海參老鴨蔬菜之品食之無庸忌也况大患潰後氣血兩虛脾胃並弱非有味之物何以滋補虧傷若徒恃區區無情之草木以爲調理吾知其無病者且不可而謂其有病者爲宜乎人之維身止此血氣血氣已虛不爲迴護至胃敗陰虛枯陽燔熾七惡變亂而成敗證者是

誰之咎歟此乃醫家病家之積弊所以不可不亟講也至於忍餓傷精過飽傷氣茹冷成痞等類又惟在知命者自愛焉

陽癰證治則例

凡患色紅疼痛根盤寸餘者癰也毒發三四日尙未成膿

以抑陽散

通用五十七

圍患外內以醒消丸

通用四十七

熱陳酒送服三

錢其痛卽止夜閒得睡次日患皮起皺再一服全消如過

四五日患將作膿亦以醒消丸與服消其四圍腫鞭痛息

毒散此以大變小之法有膿之患頂取鰈頭膏

通用六十一

貼加

以代刀散

通用三十九

三錢酒服穿之或以鍼刺分許穿之以洞

天膏

通用

貼不幾日收功如患盤數寸者或居背心腦後

腰肚胸腋陰囊等險穴處則用五通丸

通用

三錢醒消丸

三錢早晚以敗毒湯

通用

輪服皮皺痛止再服至愈倘潰

卽用內托散

通用

醒消丸亦早晚輪服

一初起兼發熱惡寒肢體拘急者散消飲

通用

主之待

表證退再按前法治之

一潰後忽見惡寒發熱等表證者托邪飲

通用

主之待

表退按前治法

一大便乾燥祕澀雖數日不解宜潤之不可下也潤腸

煎

通用

主之如有表證只宜解表表解而裏自通設

仍不通投以潤腸煎

一大癰不論已潰未潰但發熱而不惡寒者此熱勝血

也敗毒湯加四物湯

通用

主之

一妊婦患癰不可與醒消丸以丸內有麝香故也宜以

仙方活命飲

通用

去山甲愈之如既潰餘毒未盡腫

鞭不消治以內托散去川芎加乳香沒藥

一醒消丸內麝香價貴如有家貧不能服者以仙方活

命飲代之然不及醒消丸速效

陰疽證治則例

陰疽之形皆濶大平塌根盤堅鞭皮色不異或痛或不痛

乃外科最險之證倘誤服寒涼其色變如隔宿豬肝毒攻
內臟神昏卽死治之之法非麻黃不能開其腠理非肉桂
炮薑不能解其寒凝腠理一開寒凝一解氣血流行則患
隨消矣血氣不能化毒者則宜溫補排膿雖當潰膿而毒
氣未盡腫鞭未消亦仍以溫氣血開腠理爲要大抵初起
患輕未經誤藥者可用加味二陳湯通用納陽和丸通用
同煎數服消之如曾經誤藥或皮色稍變須服陽和湯通用
五其甚者與犀黃丸通用早晚輪服潰後亦然如失榮惡
核石疽等證初起毒根深固者須更兼紫元丹通用開服
方能全消凡詳見於各部中宜同參用

一初起兼頭疼發熱惡寒肢體拘急等表證者先以保

安萬靈丹

通用五十四

汗之或人蔘敗毒散

通用三

去獨活加

桂枝一錢汗之待表證退按前法治之

一潰後忽見表證則以托邪飲

通用十二

加桂枝一錢煎服

少頃啜熱粥一甌暖臥微汗取效不可令大汗如未效再進待表勢解須接補元氣用補中益氣湯加茯苓半夏熟地最妙

一初起或潰後欲嘔而別無表證者胃氣虛也六君子

湯

通用二十一

加炮乾薑主之

一潰後但惡寒而不發熱者陽氣虛也十全大補湯

通用

二十 加薑附主之

一潰後見晡熱內熱證者陰血虛也四物湯

通用去川

芎倍熟地加參朮地骨皮甘草主之

一大患久潰或膿血去多忽見發熱惡寒面赤煩燥口

雖渴而喜熱飲者此血虛發燥急以當歸補血湯

通用

三十 或當歸黃耆湯

通用

服之否則發瘕

一潰後口乾作渴飲水不歇小便頻數或淋漓作痛或

舌上燥黃如金色者乃腎水枯竭心火炎熾此證最

惡急用加減八味丸

通用

以滋補之否則不救遲治

亦不救

一潰後喘促咳嗽脾肺虛也補中益氣湯去升麻加扶
苓半夏五味子主之或加熟地口燥者加麥門冬
一潰延日久病人脾虛氣滯者則先服六君子湯加芎
歸數劑薤朮草宜生忌炙待其飲食復常再按前法
治之凡經表汗後亦如是治

一好飲之人每發酒毒如陰疽狀發無定處初起漫腫
內似結核不紅或淡紅重着板痛多有兼頭暈發熱
汗出嘔吐之證此元氣大傷酒毒熏蒸結滯經隧治
宜清利溼熱培補元氣內服加味解酲湯見發無定處痼發下
外以赤小豆爲末滾水或米醋調敷或以烏龍膏通

六敷之若誤投陽和湯小金丹等甘熱之藥輕則嘔吐膿血重則神昏發狂成痼不救此證從前未經發明余歷視頗多特表揭於此毫釐千里生死攸關業醫者細心審辨焉

一凡色白大小陰疽忌貼洞天千槌鯽魚等膏蓋寒涼不利於陰疽且內有巴豆草麻子未潰者則致潰已潰者貼則致命有孕者貼則墮胎故凡陰疽未潰者

宜敷抑陰散

通用

既潰後宜貼陽和解凝膏

通用

一犀黃丸

通用

小金丹

通用

內有麝香妊婦忌服當以

陽和湯愈之愈後再服三四劑以代小金丹永杜後

患

一小兒不能服煎劑者以小金丹化服代之

爛潰不斂治法

凡潰爛不堪之患外用藥湯

通用洗法

洗淨撒山蓮散

通用內

以洞天救苦丹

通用

每服三錢陳酒送服醉蓋取汗隔兩

日又送一服再隔兩日再送一服所空隔之兩日以醒消

丸

通用

每日一服服後毒水流盡七日後再服醒消丸兩

次接用大棗丸

通用

每日早晚各進五錢最危險者可奏

奇功

翻花起肛治法

凡癰疽年久不斂定致翻花四圍起鞭肛治之取老蟾破
腹連雜以蟾身刺數孔貼蓋患口輕者日易一次重者日
易兩次貼蟾之日內服醒消丸通用四十七每服三錢陳酒送下
止其疼痛三日後毒盡再服醒消丸通用四十七消其翻花鞭其
鞭肛功效不凡也如大患初潰者亦如前法其毒則從蟾
孔出倘肛口鞭患孔深取活牛蒡子草根枝葉或取紫花
地丁嫩草搗爛塗入肛內皆能拔毒平肛

患孔毒根治法

凡爛孔有惡肉凸起名曰毒根往往有用降藥爛去者乃
庸醫之誤也獨不知弱體豈可增痛况爛去仍又長出安

可再爛耶凡遇此證宜貼平安餅通用外以膏藥掩之一

日一易輕者二三日重者六七日不痒不痛毒根自落貼

時日服內托散通用俟毒根落後服保元湯通用四物湯

二十三通用收功

漏管治法

潰後一經夢遺走洩即成漏管如其素有此疾則先以加

減六味丸通用愈之再治其漏法用附子餅豆豉餅俱見

法灸隨患大小灸之令微熱不可令痛乾則易之每灸二三

十壯灸後以消管錠通用或鍼頭散通用紅入管內化之

如未知內之深淺可先以豬鬃探之然後用綿紙捲藥為

撚量其大小深淺塞入日易日塞至愈乃止

多骨治法

無論老少皆生多在肩床頰下手足骹膊等處因潰久毒氣流連外被寒邪襲入與膿毒凝滯藉人氣血化成法用推車散通用吹孔內如有骨次日不痛自出吹過週時無骨出則知內無多骨也大進溫補消痰之劑不致復生多骨

一小兒初生身肉之中按之有如脆骨由受胎時精血交錯所致迨其人長大後其脆骨處必然發腫生疽及潰後多骨脫出其口方收此乃胎元結成稟賦自虛不可強取

候其自破則取之治法皆同

毒氣攻心治法

凡大瘡毒氣內攻多由藥誤乃受降藥毒定致神昏煩燥惡心嘔吐等證急用生甘草一兩煎濃汁調護心散通用四十一令病者時刻呷呷至大半自然嘔止神清然後接服醒消丸通用四十七以平其勢

破傷風治法

破傷風者因跌撲金刃傷破皮肉及新久諸瘡未合口失於調護風邪乘虛襲入經絡宜亟治之如遲則邪陷三陰頭目青黑額上汗珠下流目瞪身汗如油腹滿自利舌卷

囊絡皆莫救矣要在初受風時其證發熱惡風筋脈拘急
身關噤急傷口鑷腫脹或四圍起粟作痒此風熱尙鬱
在表急取玉眞散通用四十二錢溫酒調服蓋被暖臥一時許
即可消散如入裏勢甚舌強口噤項背反張口吐涎沫不
省人事四肢抽搐無有甯時者取玉眞散三錢用童便調
服雖有瘀血亦愈至於昏死心腹尙溫速進玉眞散二服
亦可保全其患口以熱童便洗淨生南星爲末糝之或以
水調塗之出水方妙待風邪勢平接進榮養氣血之劑八

珍湯

通用二十五

爲宜

發瘧治法

癰疽發瘰敗證也勢類破傷風身關緊急四肢強勁腰背反張肢體抽搐有汗曰柔瘰無汗曰剛瘰皆緣癰疽大潰亡血過多筋無所養治宜大補氣血用十全大補湯通用二十六手足逆冷加桂附倘誤作中風則速其危矣。

瘡口誤入毒水治法

瘡潰未合誤入皂角汁毒及一切污穢毒水復致患口焮腫疼痛先以藿香湯洗淨用白礬桃丹炒等分細末撒之或烏梅嚼爛塗之亦可如患者疼痛切骨煩悶發昏恐毒內攻則用馬齒莧五錢酒煎飲之盡醉取效

瘡中生蛆蟲治法

夏日諸瘡潰爛失於洗滌積膿污穢致蒼蠅叢聚生蛆用
卓礬水飛末糝之其蛆卽化爲水或以鹿角燒灰醋調塗
之或以柏枝燒瀝取油塗之亦有冬月瘡潰生蛆者陰溼
所化也治法亦同

頭部證治

大頭毒

鱗瘡頭

鬚毛瘡

禿瘡

蛀髮癬

肥瘡

白屑風

油風

腦蝕

頭響

筋脈

巔

頭頂也巔骨俗名天靈蓋

足厥陰肝脈與督脈會於巔足太陽膀胱

脈交巔足少陽膽脈交巔

腦

頭骨之髓也

足少陰腎筋屬海髓足太陽膀胱脈絡腦角

旁稜處

足少陽筋皆直上頭角

額顙

髮際之下兩眉之上是也亦名額

足陽明胃至額顙手陽明太陽筋

上額左角手少陽三焦筋結額上角足太陽膀胱筋下

額

髮足少陰腎主之

癰疽就簡

百會疽

亦名玉頂發生巔頂正中百會穴

佛頂疽

生額門之前

勇疽

亦名腦發生目小

昔之後五分童子膠穴

鬢疽

生左右鬢角

額疽

生額正中

旁額疽

生額左右角上

疽

生腦後玉枕骨上

腦後發

生玉枕之

透腦疽

生百會穴之前

之侵腦疽

生透腦疽前

腦鑠

生腦後風府穴

二髮疽

生髮內

門上小兒患

名鱗瘕頭

俱按癰疽則例治之

大頭毒

俗名大頭傷寒

頭目赤腫耳前後尤甚疼痛不可忍發熱惡寒咽噎填塞
牙關緊急涕唾稠黏飲食難下不得安臥此乃寒覆皮
毛鬱遏經絡不得散聚而爲腫宜以苦溫之劑溫之溫
經散寒用托裏溫經湯依方服之以薄衣覆其首以厚
被覆其身臥於暖處使經血溫腠理開寒氣散陽氣升
大汗出後腫減八九再去麻黃防風加連翹牛蒡子全
愈

一凶荒之際疫氣流行凡患如前證而家家戶戶傳
染者當按後面部時毒之法治之

托裏溫經湯

麻黃

五分或八分

升麻

五分

防風

乾葛

人參

白芷

當歸

白芍

甘草

蒼朮

各一錢

右水二鍾煎一鍾服臥暖處得汗乃散或加柴胡

鱗瘕頭

瘕久名
樓計串

患生嬰孩頭髮內腫塊不紅初起往往錯認跌腫至高大
作疼方知覺醫者每以爲頭屬陽漫用清涼解毒是以
潰者肉膿復瘻增出不一不知此患色白其膿不紅乃
陰寒虛弱之證也宜用小金丹療之初起三服乃消潰

後七丸而愈外貼陽和解凝膏如能服煎劑者則以加
味保元湯加當歸熟地服之尤善

小金丹

通用五十二

陽和解凝膏

通用七十七

加味保元湯

通用二十九

髮髮瘡

又名髮際瘡

生頭上及頂後髮際頂白肉赤狀似葡萄痛如錐刺痒如火燎破流膿水亦有浸淫髮內者惟胖人多生之乃內鬱溼也宜貼以黃香餅

黃香餅

黃檗

一兩

乳香

三錢

右各末共研槐花煎水調作餅貼之

禿瘡

生頭皮上初起小者如豆大者如錢其痒難堪撓破出水結白膿痂日久延蔓成片髮盡根絕此證多係胎毒宜用防風通聖散料以醇酒浸透焙爲細末每服一錢或二錢量其壯弱用之食後白滾湯調下服至頭上多汗爲驗外於罐頭後煎滾水冲灰湯溫洗敷掃蟲散敷後不可再洗日日敷藥至愈乃止

防風通聖散

通用

以八劑作一料
生甘草倍用

掃蟲散

獨核肥皰

一個分開去核以洋糖填實內入巴豆仁每片兩粒半仍將肥皰合好外用綫紫台

泥包固火煨取出冷輕粉末
定去泥研爲極細末

檳榔 各八分

右藥共研細末香油調膩敷之

附方 存驗

大楓子仁 木鼈子仁 蛇牀子

各五錢

輕粉 三錢

右藥共研細末麻油入小鍋內熬至滴水成珠調之以
刀刮去瘡痂花椒湯洗淨將藥敷上日敷一次八日愈

又方 存驗

藜蘆 一兩

右研極細末豬脂調塗之

蛀髮癬

頭上漸生禿斑久則運開乾枯作痒由陰虛熱盛癰頭時風邪襲入孔腠搏聚不散血氣不潮而成用生木鼈切片浸數日入鍋煮透煎湯癰頭後洗之搽蜈蚣油至愈乃止又法用草烏連皮切片炙脆研粉醋調日塗三次數日愈

蜈蚣油

大活蜈蚣

三條用菜油三兩浸四五日後以油聽用

肥瘡

俗名黃水瘡

隨處可生而生於頭面者居多初如粟米痒而兼痛破流黃水浸淫成片乾則結成堆痂屬脾胃溼用白明礬研

粉鋪綿紙上捲作長條打成結子幾個入菜油浸透放
鐵篩上用火燒結結內油滴下以碗盛之燒至枯將諸
結研粉秤之加製松香末等分共調油內熱以拂瘡早
晚兩度五六日愈或以花椒湯洗淨擦繡毬丸亦效或
以六一散加枯礬麻油調擦每六一散一兩入枯礬二
錢立效忌食肉蝦蟹一切動風助熱之物食則延開難
愈

繡毬丸

見發無定處瘡疥

白屑風

又名白駁

生髮內初起微痒久則漸生白屑疊疊飛起脫之又生此

風熱所化也用零陵香官白芷等分煎汁俟冷入雞子白攪勻日塗二次或以二味浸油飾髮香澤異常且不起屑如有延生面目耳項燥痒者當與後面部油風參治

油風

又名鬼薙刺
俗稱落髮

頭髮乾枯成片脫落皮紅光亮痒甚由血燥有風所致夫髮爲血餘腎主髮脾主血髮落宜補脾腎故婦人產後脾腎大虛多患之丹溪云脈弦氣弱皮毛枯槁頭髮脫落黃耆建中湯主之髮脫落及臍下痛者四君子湯加熟地黃鹿角膠每日清晨用醇酒化服三錢至於外治

方法雖多而錯節盤根還當內治

一白禿無髮用川椒四兩酒浸收瓷器內蓋好不洩氣
日以搽之

一赤禿無髮用牛角羊角燒灰等分豬脂調敷

一病後髮落用猴薑野薔薇枝煎汁刷之

一髮禿不生用嫩桑樹皮一把斫一尺許滿插空瓷瓶
內勿令到底上面以火然之則下面必有汁滴瓶內
先以熱水洗頭後將此汁刷在禿處卽生髮矣

一毛髮黃赤用羊矢燒灰和臘豬油塗之日三次夜一
次至髮黑乃止

一髮槁不澤用木瓜浸油梳頭或用胡麻油常塗之梳須用黃楊木者佳

一年老髮白當拔去白髮以白蜜塗毛孔中仍用梧子搗汁塗之必生黑髮又方青殺羊矢納鯽魚腹中瓦缶固濟燒灰塗髮易生而黑甚效

一頭上生虱用水銀同茶葉漬溼搗和不見水銀塞髮內數日即盡又方用銅綠明礬摻之或用藜蘆末摻之俱妙

黃耆建中湯

桂枝木 一錢

炙甘草 一錢

芍藥 三錢

黃耆 五錢

膠飴 一兩

大棗 六枚

生薑 一錢

右水煎去滓入膠飴微火上燉和溫服方以甜故也

四君子湯 二十

腦蝕

腦中痛若有蟲蝕食髓者用桃葉作枕枕之其蟲自鼻出

頭響

頭響乃氣挾肝火八味逍遙散主之 十五

亦有頭內如蟲蛀響名天白蟻用茶子研細末吹鼻中即效

面部證治

時毒

面腫

面瘡

疔腮發頤

疔瘡

面游風

面塵

雀斑

黑痣

眉核

眉瘡

眉稜骨痛

眉跳

落下頰

燕窩瘡

面皮破

筋脈

頭前五臟之精氣上熏於面顴骨之下迎香穴之外爲

面中央應乎手陽明大腸兩顴之內面主之上應乎手

太陽小腸其脈循頰上頰目下斜終於顴山

眉目心足厥陰肝脈從目系過眉上額足少陽膽筋脈過

眉角

顴顴爲骨本即面兩旁之高起大骨也腎主之足太陽膀胱足少陽膽手陽

明大腸筋皆結顴足陽明胃經合顴太陽小腸脈經顴
髃骨穴在頰下銳骨端陷中

頰耳前顴側面兩旁之稱也手陽明大腸脈筋俱上頰手太陽小腸脈

上頰足陽明胃脈循頰而上足少陽脈俱過頰足厥陰

肝脈下頰手少陽三焦筋過曲頰脈亦交頸

頷頷下結喉上兩側肉之空轉處也手太陽小腸筋結頷足少陽膽筋脈

俱過頷

人中

鼻柱之下唇之上穴名水溝

手陽明大腸脉交人中督脉人中水

溝穴

髭

在口上曰髭

大腸主之血氣盛則髭美衰則無髭

鬚

在口下曰鬚

大腸主之血氣盛則鬚美衰則無鬚

髻

在頰曰髻

胃主之血氣盛則髻美而長血少則髻短氣少則

髻少血氣皆少則無髻

癰疽就簡

額瘍

生額骨尖處

頰瘍

生耳下頰車骨間

鳳眉疽

生眉稜骨

眉心疽

生兩

眉中間又虎

毒

生下唇之下中央又俱名頰癰又名承漿疽

按癰疽則例治

之

一形小如豆色紫頂焦或如泡痲痒木痛惡寒發熱者
疔也當按疔瘡治法如生人中正中名龍泉疔尤惡稍
遲多致不救

時毒

俗名大頭天行

時毒者四時不正之疫氣而感於人也初覺憎寒發熱恍
惚不甯肢體痠疼或兼咽痛次發腮項頤耳前後腫
盛無頭或似結核或兼起疙瘡甚至頭面俱腫焮赤疼
痛口舌乾燥咽喉不利常見年歲凶荒芻蕘之人多患
之乃飢飽不時胃氣有損邪氣乘虛而入客於心肺之

開上攻爲患宜從輕治安裏爲主兼升散解毒用普濟
消毒飲最善如不應則宜砭去惡血仍投前藥卽應更
於鼻內啗通關散取十餘嚏卽效若啗藥不嚏及神昏
喉塞語言不出者不治凡左右侍病之人日日用啗藥
取嚏始不傳染此預防之法也

閱諸書治法凡初起耳項腫痛狀似傷寒惡寒發熱者
人淺敗毒散微汗之兼口渴大便秘結表裏俱實者防
風通聖散疏利之無表裏證或已汗下腫不消者小柴
胡湯加連翹元蔞桔梗薄荷鼠黏子天花粉或加酒炒
黃連和解之如已汗下解毒不消勢將作膿氣弱難潰

者用消毒托裏此皆古人治時毒之法錄備參用

普濟消毒飲

黃連

五錢酒炒

黃芩

五錢酒炒

橘紅

二錢

元蔞

二錢

生甘草

二錢

人蔞

三錢

連翹

一錢

馬勃

一錢

鼠黏子

一錢

薄荷葉

一錢

板藍根

一錢

桔梗

二錢

白殭蠶

七分炒

升麻

七分

柴胡

二錢

右爲細末半用湯調時時服之半用蜜丸噙化之服盡

卽愈或加川芎當歸咬咀三五錢水煎稍熱時時服

之如大便秘加熟大黃一錢或二錢以利之

消毒托裏散

黃耆

人蔘

白朮

當歸

白芍

川芎

甘草

白芷

金銀花

熟地黃

數分量用之

右水煎分瘡之上下食之前後服之

通關散

細辛

用真者藥店每以馬蹏香草亂之

薄荷

豬牙皂角

右等分爲極細末以紙燃少許入鼻內候得嚏口開隨

進湯藥一方止用二味無薄荷

人蔘敗毒散

通用三

防風通聖散

通用七

小柴胡湯

通用十四

面腫

面腫有虛實虛腫者形羸脈弱無痛無熱面目浮白或兼氣喘乃大虛之候用八珍湯十全大補湯主之實腫者形強脈壯紅腫面熱煩渴或按之痛乃陽明壅實風熱上攻小兒多有此證宜用防風通聖散甚者以木香檳榔丸下之外以杏仁杵膏塗腫處

一因飲酒過度溼熱上蒸面腫者用四君子湯加藿香葛根滑石天花粉主之

一額上熱氣熏面腫痛者用炊布燒存性敷之

木香檳榔丸

木香

檳榔

青皮

醋炒

陳皮

炒

枳殼

炒

黃檗

酒炒

黃連

吳茱萸湯炒

莢朮

以上各五錢醋煮

三稜

五錢醋炒

大黃

一兩酒浸

香附

黑牽牛

各二兩

右用芒硝水丸每服一錢或二三錢量虛實服

八珍湯

通用二十五

十全大補湯

通用二十六

防風通聖散

通用七

四君子湯

通用二十

面瘡

亦名面發毒

生面上頰車骨初起一個漸發數個形如赤豆色紅炊腫

疼痛堅硬似疔時浸黃水係肺胃風邪內用地榆山梔

紫草薄荷各二錢枇杷葉去毛五錢生甘草一錢竹葉

二十片水煎熱服外取柳葉湯洗面土瓜根汁塗之或

杏仁研如泥雞子白調敷之

一有瘡如水痘延蔓遍生者用黃檗一塊豬胰塗炙酥爲末溼者乾滲乾者麻油調搽

一婦人面起細瘡名粉花瘡用定粉五錢菜油調泥梳內以艾葉燒煙熏之候煙盡覆地上一夜取出搽之且無瘡迹

疔腮

又名含腮

發頤

又名汗毒

患生於腮有曰疔腮有曰發頤當分別治之腮內痠痛者疔腮也以赤豆散敷之病後兩頤發腫不作痠痛者發頤也宜表散風毒用白芷天麻防風荆芥各一錢陳酒

煎服醒消丸三錢卽愈

赤小豆散

赤小豆

一味研細末米醋調敷立愈

醒消丸

通用四十七

肝瘡

面上起紫皰名肝瘡係肝火用四物湯加胡黃連柴胡甘草膽草黃芩人蔘煎服外取鹿角尖磨濃汁厚塗之

一生紫塊疙瘩大如錢或滿面俱有漸成麻風用牛舌草根四兩取汁穿山甲十片燒存性川椒末五錢生薑四兩取汁研和細絹包擦如藥乾加醋調連擦數

次卽愈忌食動風物

面游風

初起面目浮腫燥痒起皮如白屑風狀次漸痒極延及耳
項有時痛如鍼刺溼熱盛者浸黃水風燥盛者乾裂或
浸血水日夜難堪治宜養血潤膚飲兼六味地黃丸早
晚輪服十餘日取效外用生豬脂頻潤抹之或用鰻鱔
魚汁取油塗之

養血潤膚飲

當歸

三錢

熟地

生地

黃耆

各四錢

天冬

去心

麥冬

各二錢
去心

升麻

片苓

各一錢

桃仁泥

紅花

各六分

天花粉

一錢五分

右水煎溫服如大便燥結加火麻仁郁李仁各五錢如風盛痒甚加明天麻一錢五分

面塵

又名黧黑斑又名黧黑野翳

面色如塵垢日久煤黑形枯不澤或起大小黑斑與面膚相平由憂思抑鬱血弱不華外用玉容散每早晚蘸以洗面內宜疏膽氣兼清肺加味歸脾湯送六味地黃丸主之有女貞散一方方理頗佳附錄備用

一有好食斑鳩而致者初面生黑斑數點日久面俱黑蓋斑鳩常食半夏苗以中其毒故也用生薑一味搗

取汁將渣焙乾研細卽以汁黏丸每日早晚服二三錢一月可愈

女貞散

黃丹

水飛去鹽砂炒透
攤地出火氣用

紫苑

眞者

右二味等分爲末每服二錢日兩服陳酒下

玉容散

甘松

三柰

茅香

各五錢

白殭蠶

白芨

白蘇

白附子

天花粉

綠豆粉

各一兩

防風

零陵香

藁本

各三錢

肥皐

三錢
去皮弦

香白芷

一兩

右爲細末每日早晚蘸末擦面

附方 存驗

殺羊脰骨

右爲細末雞子白調敷日以白梁米泔洗之三日效

加味歸脾湯

通用三十二

六味地黃丸

通用四十三

雀斑

生面部碎點無數其色淡黃或淡黑乃腎水不榮於上浮火滯結而成內宜服六味地黃丸以滋化源外用玉容散早晚擦洗自愈

六味地黃丸

通用四十三

玉容散

見前面塵

黑痣

形如微點小者如豆比皮膚高起一綫有自幼生者有中年生者係經絡之血滯於衛分陽氣束結而成用綫鍼撥破痣頭以膏點之不可太過恐傷好肉三四日結痂其痣自落須戒醬醋愈後無根

點痣膏 一名水晶膏

礦子石灰五錢爲末濃蘸水大半茶鍾浸之以蘸水高灰二指爲度取糯米五十粒撒於灰上如蘸水浸乾陸續添之泡一日一夜冬月兩日一夜將米取出搗爛成膏先以綫鍼撥破挑少許點之點多恐傷好

肉

眉核

眉間生核初如豆日久漸大如桃宜養肝血清肝熱益元氣用逍遙散犀黃丸日服消之外以生南星末葱汁調敷

逍遙散

通用十五

犀黃丸

通用四十八

眉瘡

眉叢生細瘡如疥作膿破流黃水結痂小兒多患之用寶山甲前膊上甲炙焦爲末入輕粉少許研勻菜油調搽卽愈又方用蒜瓣燒灰鐙蓋油調搽

一眉毛脫下用橄欖核火煨存性研細麻油調火上燉微熱以指頭蘸油於兩眉不住揩抹又方垂楊柳葉陰乾爲末用薑汁於鐵器中調之夜夜摩抹俱效
一眉毛不生用白芥子半夏等分爲末生薑自然汁調搽數次卽生

眉稜骨痛

眉屬肝肝脈從目系上額肝膽相表裏足少陽風熱與痰則眉稜骨痛用加味道遙散加天麻防風半夏治之熱盛者加黃芩兼頭惡寒者去白芍丹皮梔子加川芎羌活

一有眼不能開書靜夜劇是溼痰則用二陳湯加蒼朮枳殼蘇子

一有肝虛血少纔見天明眉稜骨疼用四物湯加甘菊鮮首烏挾風加羌活防風有熱加丹皮黃芩

加味道遙散

通用十六

二陳湯

通用十七

四物湯

通用二十三

眉跳

眉跳者眉毛搖動目瞪不能視喚之不應但能飲食乃奇證也用蒜三兩取汁酒調服

落下頰

落下頰乃氣虛之故不能約束機關也令患者平身正坐

以兩手托住下頰左右大指入口內納槽牙上端緊下頰用力往肩下捺關竅向腦後送上卽投關竅隨用絹帛兜頰於頂上半時許去之卽愈又方用烏梅一枚含燕亦可自上

燕窩瘡

生於下頰初如粟如豆色紅熱微痒痛破津黃水頗類黃水瘡但疙瘡如攢耳係脾胃溼熱宜服苓梔平胃湯外搽碧玉散

苓梔平胃湯

蒼朮

二錢炒

甘草

五分

厚樸

一錢二分

陳皮

一錢二分

黃芩一錢五分 山梔仁一錢五分

右水二鍾煎八分食遠服

碧玉散

黃檗末 紅棗肉焙乾存性爲末

右等分加枯礬減半共研細末香油調敷

面皮破

凡面皮跌破及抓破用人乳頻塗立結靨卽日愈或生薑自然汁輕粉末和塗

眼部證治

目赤腫

內障

外障

迎風流淚

目痒

暴盲

雞盲

赤眼淹纏

爛眼

拳毛倒睫

偷鍼眼

眼丹

眼瘤

眼痣

皮翻證

眼胞痰核

椒瘡粟瘡

漏睛瘡

肝脹

血漬

眼衄

小兒目疾

瞋目

筋脈

睛窠

一名目胞即兩目外衛之胞也

血之精爲目窠之總絡

瞳神

俗名瞳人

屬腎爲骨之精腎水虧損英華不斂則瞳神散

大無光

黑眵

瞳人黑輪

屬肝爲筋之精內連目系

內廉深處目睛入腦之系

肝火上

沖則兩輪赤痛

白眵

黑輪外四圍白處

屬肺爲氣之精肺火上騰則白眵有紅筋

目網

即上下目胞之兩臉又名目睫

屬脾爲肌肉之精足太陽膀胱細筋

散於目上網足陽明胃細筋散於目下爲目下網

兩眦

近鼻之眼角爲內眦亦名大眦近鬢之眼角爲銳眦亦稱外眦

屬心爲血之精手太

陽小腸支脈至內眦足太陽膀胱脈起內眦手太陽小

腸手少陽三焦筋脈俱至銳眥足少陽膽脈起銳眥筋亦結內眥

睫毛脾胃主之

淚肝主之肝風動則淚出淚熱肝實淚冷肝虛

治目大要

目有專科諸書多畧之然有他證兼患目者治目之道安可不明夫五臟六腑之精氣雖皆上注於目大要則在三經肝開竅於目故論目必首肝然有心神散亂卒見非常之怪或精散視歧觀一物爲兩則心又爲目之大關蓋諸脈皆屬目心主脈者也而脾又爲諸陰之首五

臟六腑皆稟脾氣上貫於目而爲明脾胃虧損臟腑之精氣皆失所司不能歸明於目矣細辨虛實再辨虛實之在氣在血暴發在表爲實久病在裏爲虛虛者昏暗黑花瞳散在氣則迎視物不明在血則痠乾枯少潤治宜養肝血安心神尤必先理脾胃實者赤腫脹痛翳膜眵淚治宜除風散溼涼血平肝此治目大要也點洗之方只宜辛平若用寒涼阻逆之致邪熱內攻反成翳障及妄將冷水冷藥冷物澀洗致昏瞎者有之不可不慎

目赤腫

目爲肝竅目病宜歸肝凡紅赤腫痛及少壯暫得之病皆

作肝實血熱治肝爲相火治當益陰陰旺而相火自平
肝主風木又爲外邪合之則腫而痛治當散邪邪去而
內風自息閱坊書眼科多用苦寒辛散等藥非所宜
因治復目湯一方藥雖平淡而屢用屢效蓋目爲五臟
六腑之精氣不堪投猛峻藥外治則用丹砂散點之最
爲穩妙

一有時火暴甚而赤痛異常者用雞子黃連膏點眼皆
勿令緊閉待熱淚湧出數次卽愈

一凡年及中衰或酒色過度目無腫痛但羞明昏暗
視無力眯痛如摳等證則皆屬肝腎之不足也治參

內障條

一損目破睛用牛口涎點之如睛突出者急揉進日點
二次須避風卽黑睛破者亦有可愈
一眼目被打傷青腫者用生半夏爲末水調敷之

復目湯

當歸 二錢

赤芍 二錢

大熟地 五七錢
或用生地

黃芩

一錢五分
分酒炒

薄荷 二錢

甘菊 二錢

甘草

五分

川芎 一錢

右水煎食後臥時稍熱服 痒加蟬退防風各一錢五
分 腫加羌活木通各一錢 痛加酒連五分山梔

仁一錢 翳膜加木賊刺蒺藜各二錢柴胡一錢或
八分 傷酒加葛根二三錢 目眵夜痛加夏枯草
香附各二錢 目中赤脈加蜜蒙花二錢 白眼上
紅不退加桑白皮三錢 兩瞳痛去川芎加澤瀉一
錢五分鹽炒黃檗一錢 肝虛淚多加鮮首烏五七
錢或一兩 紅腫而不羞明者加山萸肉杜仲各二
錢 腫痛兩眼如桃合而爲一痛不可忍者先用防
風通聖散下之然後服此方加連翹蔓荊子各一錢
五分

丹砂散

此李時珍方也

點治諸眼皆妙

海螵蛸去殼皮

蘆甘石上好者煨碎童便浸七次飛用

硼砂各一兩

辰砂水飛五錢用此則不枯

右研極細末如灰瓷瓶收貯臨用少加冰片研點

二百味草花膏

羯羊膽一枚

白蜜五錢要眞白蜜未用上白洋糖兌過者

右將膽汁同蜜和勻椀盛蒸稠如膏瓶收每用少許點之如日久藥乾用人乳潤之

雞子黃連膏

雞子一枚

黃連粗末一錢

右將雞子開一小竅取雞子清以瓷椀將黃連末子糝

於雞子清上用筯徹底速攪打數百使成浮沫約得半碗許傾出清汁用點眼皆勿得緊閉眼胞擠出其藥待熱淚湧出數次卽愈內加冰片少許尤妙按此方治火眼暴赤疼痛熱在膚腠淺而易解者點數次可愈如熱由內發火在陰分者不宜用此寒涼非惟不能去內熱而且閉其火邪也

內障

內障與不病之眼相似並無腫痛翳膜惟睛昏黑無光若有所障然內實無障也其珠色青藍或微兼綠色眼科雖有烏風障綠風障青風障黃風障高風昏花障肝虛目脹振驚內障等名總由血少神勞肝腎虧損精竭視

昏神竭視黑治當專補腎水兼補其氣用加味明目地黃丸或八珍湯加甘菊淮山藥牛膝山萸肉枸杞子穀精草五味子夏枯草天冬麥冬等藥酌用之

一目眇痛至夜更甚連眉稜骨及頭半邊腫痛以苦寒藥點服反甚者用夏枯草香附炒各二兩甘草四錢共爲末每用三錢清茶調服四五服可愈

一中見禽蟲飛走紛紛不已者肝膽病也用酸棗仁炒羌活青箱子元明粉各一兩爲末每水一盞藥末二錢煎和渣服日二次

加味明目地黃丸

生地黃

一觔酒炒

人蔘

四兩

五味子

三兩

牛膝

二兩

麥冬

六兩去心

歸身

五兩

甘枸杞

五兩

甘菊

八兩

右研極細末煉蜜爲丸

八珍湯

通用二十五

外障

外障者眼生翳膜如圓翳

色白或大或小

冰翳

如冰凍堅白

滑翳

如水銀珠

子微 迎翳

色微赤如凝脂

散翳

點如魚鱗乍白

橫翳

橫如劍脊下微黃甚薄

浮翳

白色環 沈翳

藏睛深處

偃月翳

形如月牙身

棗花翳

周圍如鋸齒

白翳黃

生大小 心

背頭四邊白中心一點黃

黑花翳

青色

星月聚散翳

黑眵上四點白心

斑瘡入眼努肉攀睛此皆有餘之證多由腎水虧泛陰

火內鬱不得升發或誤用寒涼點洗致風熱阻逆而成
初起邪氣未定翳膜浮淺者易治日久邪氣已定翳膜
深牢者難治治宜宣發不宜疏利疏利則邪氣內播爲
翳益深當用撥翳湯藥肝湯早晚輪服使邪動翳浮佐
以丹砂散點之緩緩取效戒暴躁惱怒並忌煎炒辛熱
等物

一努肉攀睛大背赤肉堆起用杏仁十四枚去皮尖嚼
吐於手心乘暖以綫纏筋頭點努肉上日三次努肉
漸消

一赤脈貫瞳人用元薑爲末米泔煮豬肝日食之

撥翳湯

生地黃

三錢

歸身

一錢五分

柴胡

天花粉

牛蒡子

川芎

防風

薄荷

草決明

白蒺藜

蜜蒙花

穀精草

白粉葛

梔子

酒炒

木賊草

去節

羌活

各八分

川連

三分酒炒

甘菊

二錢

右加生薑一片水煎食遠服如大便秘澀者加酒炒大

黃一錢五分大便通潤仍除之

按每日早服藥肝湯晚服此劑

藥肝湯

黑羊肝七尖

四兩如無羊肝即用公豬肝亦可

兔糞八枚

木賊 去節

當歸身 各二錢

蟬蛻 二十四個 去頭足

右先將兔糞木賊當歸蟬蛻四味用清水二大碗入瓷罐內漫火熬滾令其性味俱出後將羊肝七尖切薄片入於湯內一刻即熟先飲湯後食肝每日清晨用之晚服撥翳湯兩月之久翳膜可消一半百日可全愈

還瞳散 存驗

消翳膜遮睛

蜜蒙花

一觔蜜水拌蒸

木賊

四兩去節微炒

川羌活

八兩蜜炒

白蒺藜

四兩焙黃去刺

石決明

四兩九孔者良火煨

右共為末每服二錢清茶下

丹砂散

見前目赤腫痛

迎風流淚

淚爲肝液風行水流風動則淚出又肝熱多淚如燒竹瀝火炙瀝出迎風出淚風火合也火發風沖相搏致淚疏風散火雖是正治亦當審肝經之虛實實用復目湯加防風蔓荊子首烏虛加人蔘外用霜後桑葉煎水頻頻洗之

復目湯

見前目赤腫

目痒

凡目運眩多淚痒不可忍者風也風動肝木吹噓鼓舞故

運眩不止無火故不痛治以疏風爲主四物湯加防風
荊芥蘇葉薄荷各二錢主之或加蟬蛻僵蠶

四物湯

通用
二十三

暴盲

平日目無他病外不傷輪廓內不損瞳人倏然盲而不見
此氣脫大虛之候急煎人蔘膏或保元湯大劑熬膏服
之血脫者亦照此治經云血脫益氣是也

一有平素好飲熱酒胃氣受傷汚濁之血積其中而然
者必其形實脈澀用四物湯加蘇木桃仁紅花陳皮
煎調人蔘服之如二三服後鼻面見紫黑色者此滯

血行也再服數劑愈

謹案丹溪醫案人夢下有未字

一有因受陰溼之氣胃陽受困忽然視物不見或有時
畧見而不明其人必食減神倦脈緩大無力用白朮
爲君黃耆茯苓爲臣附子爲使服十餘劑愈

一有每睡起則視物不明或赤腫良久卻愈者此血熱
也用生地汁浸粳米半升曝令透骨乾再浸再曝三
次用瓷瓶煎湯令沸下地黃米四五匙煮成薄粥湯
待溫食半飽後飲三盞卽睡數日愈或用四物湯去
川芎倍生地加丹皮黃芩酒炒各一錢水煎臨臥服
數劑愈

保元湯

通用

四物湯

通用

雞盲

俗又名雀盲外科日高風內障

兩眼至晚不見至曉復明此元陽不足之病用蒼朮散久服自愈

蒼朮散

茅山蒼朮

米泔水平浸一夜切片焙乾

右爲細末每用三錢取羊肝

如無羊肝以豬肝代之

一二兩批開糝

藥入內麻纒縛定用酒一合水一碗砂鍋內煮熟臨

臥服之

赤眼淹纏

赤眼有經年不愈者皆因肝腎陰虛邪熱留滯故耳用桑白皮杜仲各二錢厚樸檳榔各一錢共爲粗末取雄雞肝一具不經水去紅筋同藥入白酒釀六兩隔湯煮熟瀝去藥渣以酒肝食之隔兩日再如法食一法接用六味地黃丸加首烏四兩蜜蒙花二兩同爲丸服之愈

六味地黃丸

通用
四十三

爛眼

眼眶沿邊赤爛垢膩乃脾經溼熱上蒸用萬金膏貼之熱盛者服瀉黃散

一溼熱鬱久必生蟲用覆盆子葉搗汁以紗蒙患上滴

漬下少頃蟲從紗中出其細如綫赤而長不過三四日蟲盡即愈或收覆盆子葉曬乾搗細末臨用以人乳少許浸半日用之

萬金膏

五倍子

黃連

防風

荊芥穗

當歸

川芎

苦蘆

各四錢

銅綠

五分

右生研極細末以薄荷煎汁丸彈子大臨用時以熱水化開一丸乘熱洗眼日三次神效

瀉黃散

石膏

煨四兩

防風

二兩蜜水炒

稀荻草

三兩酒炒曬乾

梔子仁

一兩生用

甘草

二兩

右研極細末每服二三錢小兒服一錢白滾湯調下日二服

拳毛倒睫

脾胃氣虛目緊皮縮眼瞤上小睫毛倒入眼中謂之拳毛倒睫補中益氣湯加石斛蟬蛻川芎主之禁用芍藥五味等酸收之劑外取虱血點入眼內數次愈又法用木鼈子一個去殼爲末綿裹左眼塞右鼻右眼塞左鼻數夜自愈

一有伏熱內攻陰氣外行所致者去其伏熱眼皮便寬

則毛立出宜用升陽散火湯外治同上

升陽散火湯

連翹

黃芩

蔓荊子

升麻

羌活

柴胡

各一錢五分

歸身 二錢

生地 四錢

甘草

一錢生用

右水煎食後溫服

補中益氣湯

通用三十

偷鍼眼

生睫邊形如豆粒有尖以綿鍼刺破卽瘥故俗名偷鍼乃
太陽經結熱也如刺後風邪襲入瘡口面目浮腫目赤

迎痛者用芎皮散二錢菊花湯調下覆頭出汗卽愈
芎皮散

川芎 二兩
青皮 一兩

右共爲細末每服二錢菊花煎湯調服

附方 存驗

生南星末同生地黃搗膏貼太陽穴鍼眼自消卽刺
後冒風亦可愈

眼丹

風熱搏於眼胞則患眼丹紅腫脹疼風盛者腫輒下垂不
能視物用荊防敗毒散散之熱盛者焮紅紫色堅鞭或

疼痛用仙方活命飲去瓜蒌根加羌活川芎消之如日
久不消成膿欲潰者按陽癰則例治之然須速愈若潰
久潰深亦能成漏

制防敗毒散

通用四

仙方活命飲

通用一

眼瘤

眼皮上突出一紅疤懸如魚膽用過江蜘蛛絲

蜘蛛牽絲搭過屋者

爲過江之卽脫又方用櫻桃核磨水擦漸漸自消

眼痔

生上下眼睫邊頭大蒂小黃殼水胞如葦形或頭小蒂大
漸長垂出堅凝不痛纏綿經年不愈致成目疾初起用

清涼丸

清涼丸洗之自消有經年皮厚藥不應者法當用輭綿紙蘸水潤眼皮葷毒處少頃用左手大指甲墊於患根右手持披鍼尖頭齊根切下血出不妨用翠雲錠子磨濃塗之其血卽止內服涼膈清脾飲忌海味魚腥煎炒

當歸尾

石菖蒲

赤芍

各二錢

川連

生

地膚子

杏仁

各一錢

羌活

五分

膽礬

二分

右共研粗末以大紅綢包之如櫻桃大滾水浸泡乘熱

熏洗忌入塵土

翠雲錠子

杭粉 五兩

銅綠

黃連 各一兩

輕粉 一錢

右共研細末用糯米百粒水一盞煎半盞汁濃去米再

煎至三分和藥作錠陰乾用時水磨令濃以雞翎蘸

塗患處

涼膈清脾飲

生地

連翹

去心

梔子

生研

薄荷

荊芥

防風

石膏

黃芩

赤芍

各一錢

甘草

五分

右水二鍾燈心二十根煎八分食遠服

皮翻證

痘風眼翻

眼皮外翻如以舌舐脣之狀小兒多有之痘風眼爛胞腫
弦緊則眼皮亦翻治法皆宜瀉脾胃之積熱瀉黃散主
之

瀉黃散

見前
爛眼

眼胞痰核

生上下眼胞皮裏肉外大者如棗小者如豆推之移動不
紅不疼用生南星磨粉薑汁或米醋調濃頻敷日淺者
卽消日深者兼服二陳湯陽和湯卽效

椒瘡

粟瘡

二證生於眼胞之裏有如沙擦開張不便多淚而痛其累

粟堅赤者如椒粒名椒瘡其細顆黃輭形如黃粟者名
粟瘡俱宜服清脾涼血湯外以清涼丸洗之如眼皮裏
有紅絲堆累者乃血熱有瘀也法以燈草刮絲處令血
出卽愈

一睛上生瘡用桑皮一兩以清水於白碗內浸半日視
水碧色爲度筋頭纏綿蘸點滿眼微疼勿畏日久癢
去熱汁日點十次不過二三日可愈

清脾涼血湯

荊芥

防風

赤芍

元棧

陳皮

蟬蛻

蒼朮

白蘚皮

連翹 去心

大黃

各錢五分
分酒洗

厚樸

五分

生甘草

五分

右加竹葉三十片水煎食遠服

清涼丸

見前
眼痔

漏睛瘡

生大眼角太陽膀胱經睛明穴其穴係藏淚之所初起如
豆如棗紅腫疼痛瘡勢雖小根源甚深初宜復日湯加
連翹防風荆芥銀花各一錢五分生梔仁柴胡各一錢
燈心五十寸水煎服之如潰後有膿從大眥內出者成
漏難治可用柿餅搗爛塗之或黃丹 水飛極細炒 鯉魚膽汁
和成膏日點三五次若潰斷眼邊弦者不治

復目湯

見前目赤腫痛

肝脹

眼前垂下至鼻大便血出此名肝脹羌活一味水煎數服
愈一方用獨活

血漬

眼內白珠忽黑見物如舊毛髮勁直不語如醉此名血漬
用五靈脂二錢酒調服愈

一有目赤鼻張大喘渾身發斑髮如銅鐵絲鞭乃熱毒
結於下焦用白明礬滑石各一兩水三椀煎一椀半
不住口飲盡卽愈

眼衄

眼中出血如射此陰虛相火之病宜用生地熟地各五錢
當歸白芍各二錢知母黃柏木通側柏葉柴胡黃芩各
一錢桃仁紅花各五分水煎溫服

小兒目疾

孩兒患目赤痛不能服藥者用胡黃連細末一錢人乳調
按男左女右塗腳心湧泉穴卽愈如眼生白翳取桑汁
以鐙心點之卽退

一痘後毒火攻目皆因長漿時不知用藥攻漿漿不充
滿故至回水收靨之際無形之毒火上炎攻注兩目

眼胞紅腫不能開放急以清毒保目湯連服二三劑
解之猶可免患如遲至毒火亢極翳膜遮蔽瞳人痛
苦異常日夜叫號以致兩目喪明則成廢人矣斯時
治之亦當用清毒保目湯解之於前看有翳膜遮蓋
黑白眵侵入瞳人者徐徐用撥翳湯治之於後或隔
一日一劑雖三四月之久尙保無虞不可過用寒涼
責效於數劑之間又不可聽庸俗眼科用藥磨點登
時損廢

一痘後初開眼內有星翳者取燕脂泡水鋪紙上以新
筆在紙上蘸水拂翳日三次三日愈遲治貽害

一痘後受風成迎風落淚者用蕤仁一粒去皮草紙研
浥淨油以色白爲度研粉人乳和點日三二次日另
換蕤仁再點藥隔宿者不用

一疳眼腫痛難開隱澀多淚漸生白膜雲翳遮睛外則
搗毛鷲甲揉鼻喜合面而坐宜用銀柴胡胡黃連白
蕪荑龍膽草各五分炒以雄雞肝不見水者和藥搗
爛用好白酒釀浸一宿次日置飯鍋上蒸溫服立效
忌煎炒雞魚豬首生冷發物

清毒保目湯

柴胡 一錢

蟬蛻

十二個
去頭足

當歸

桔梗

各八分

連翹

防風

荊芥穗

赤芍

牛蒡子

川芎

各七分

升麻

薄荷

黃芩

各五分
酒炒

梔子

酒炒

生甘草

各三分

右加燈心五十寸水煎溫服

撥翳湯

見前
外障

眯目

其證淚多隱翳難開睛眵凝痛初得時宜翻轉眼皮用棉裹釵腳撥出眯物來日久多生雲翳不可忽誤

一天絲風颺入目宜急治之用京墨磨濃以新筆蘸塗目內閉目少時以手張開其絲自成一塊用綿輕輕

惹下則愈如未盡再塗

案六十三葉原闕此條據證治準繩補九字餘仍闕待補